



Daifim


An Official Organ of YMA, Khuangpuilam Branch.

YMA MOTTO



Hunawl hman that
Zofate hmasawna ngaihtuah
Kristian nundan tha ngaihsan

Khawchin : Source - Accuweather.com



Ruah a sur rin a ni.
Temp - Max: 27°C Min: 22°C
Dar 5:05-ah ni a chhuak ang a,
Tlai Dar 5:25-ah a tla leh ang.

Vol - VI Issue No. - 34

- Mim Kût Thla -

13th September, 2020 (Pathianni)

*Tunkar chang vawn : Thuf. 9:10
"Lalpa ñih hi finna ñobul a ni a, Mi
Thianghlina hriat hi finvârna chu
a ni,".*

TUALCHHUNG CHANCHIN

☛ Pi V. Lalsangpuii, Vanapa section, chu ni 6 Sept, 2020 khan 'Stroke' avangin Kolasib District Hospital-ah dah luh a ni. Tluang taka inenkawla, damna ñha tak chang turin Pathian malsawmna an chan kan duhsak a ni.

☛ Tv. Zoremnuana Ralte, Pu R. Vanlalruata fapa chu Mizoram sawrkarin group A officer tur - Junior Grade of Mizoram Planning, Economic & Statistic Services (MPE&SS) lak tharah pakhatna a ni a. A hlawhtlinna kan lawmpuiin, ram leh hnam tana theih tawp a chhuah kan beiseiin kan duhsak a ni.

Thilpek hlan

Pu Ramhluna (L) chhungte'n ₹ 2,000/- leh Pu PT Liana (L) chhungte'n puan Khuangpuilam Branch YMA hnenah hriatrengna thilpek an rawn hlan a. Branch YMA chuan lawmthu a sawi a ni.

Kan ñhen tak

✚ PT Liana (Kum 48), Pu L. Zathanga(L) fapa, Khuangchera Section chu ni 7 Sept, 2020 zan dar 7:30 khan chatuan ram min pansan a. A tuk chawhma dar 11:00-ah vui a ni.

✚ H Ramhluna (Kum 73), Pu Zoramchhana (RCA) pa, Khuangchera Section (SP Complex), chuan ni 7 Sept, 2020 zan dar 10:30 khan chatuan ram min pansan a. A tuk chawhma dar 10:00-ah vui a ni.

✚ Pi Rengpitlingi (Kum 83), Pu Hauchhunga nu, Vanapa Section, chuan ni 8 Sept, 2020 zing dar 4:00 khan chatuan ram min pansan a. Hemi ni vek chawhnu dar 1:00-ah vui a ni.

An kalsan tak an chung leh khat, an laina zawng zawngte'n Pathian awmpuina leh thlamuanna an dawn kan duhsak tak zet a ni.

Village Council thar neih a ni a Tluang takin VEC thlanna pawh neih a ni

Khuangpuilam the 13th September, 2020 : Mim kut thla tahrik ni 11, 2020 (Zirtawpni) khan Khuangpuilam Village Council hlui leh tharte chuan charge inhlanna an nei a, Upa Saichhunga Hmar-in hunserh hmangin, thingpui in hona te neiin hlim takin Village Council thar chu din leh a ni ta a ni.

Hetieng hi Khuangpuilam Village Council ruhrel leh dinhmun insem dan chu a ni.

President : Pu Robert Vanlalhruaia

Vice President : Pu H. Lalroliana

Secretary : Pu David Malsawma

Treasurer : Pu R. Lalmachhuana

Member : Pu R. Vanlalvuana

Pi Mankungi

Tin, Mim kut thla tahrik ni 9, 2020 khan 7A of MGNREGS in a phut angin Village Employment Council (VEC) thlanna BNGRSK hall-ah neih a ni a. Inthlanpui tur hian BDO office lam ațangin VLA rawn kalin, VLLTF-in ruahmanna siamin section hrang hrangte vote thlak theih hun a siam a. Inthlan buaipuitute ñhahnemngaih leh inbuatsaihna a zarah tluang takin VEC thlanna neih a ni.

Khuangpuilam VEC member tur thlan tharte chu hengte hi an ni : Vice Chairman - R. Lalnuntluanga, Asst Secretary - David Lalchhandama, Fin Secretary - Lalthumhimi.

Khuangpuilam VEC

Chairman : Pu Robert Vanlalhruaia, VCP

Vice Chairman : R. Lalnuntluanga

Asst Secretary : David Lalchhandama

Fin Secretary : Lalthumhimi

Member : Village Council member zawng zawng

Thawnthu Inphuahsiak

Central YMA & AIE Construction

1. Mimal intihsiaakna a ni ang a, mi pakhatin thawnthu pakhat thehluk theih a ni ang.
2. A thehlut tam ber Branch hnenah lawmman pek a ni ang.
3. Soft copy emaw hard copy emaw thehluk theih a ni ang.
4. Soft copy thehlut turte chuan email id mail2cyma@gmail.com -ah emaw whatsapp No. +91 9862376560/ 97748 86557 / 94361 92263 / 97743 91024 -ah te thawntu theih a ni ang.
5. Hard copy thehlut turte erawh chuan Office hun chhungin Central YMA Office-ah thehluk tur a ni ang a, kut ziaak emaw khawl chhut emaw thehluk theih a ni ang.
6. Thehluttu chuan chiang takin heng - Hming, Nu/Pa Hming, Kum Zat, Branch Hming, District leh Phone No. te hi ziah lan tur a ni.
7. **September thla ral hmaa thehluk tur a ni ang.**
8. A tiña 10 (sawm) thlan chhuahte thawnthu phuah chu lehkhabu a siamin mipuite lei theih tura zawrh chhuah a ni ang.
9. A tiña 10 (sawm) thlan chhuahte thawnthu phuah chu All India Radio, Aizawl kaltlanga theh darh a ni ang a, heta hamñhatna awmte hi a phuahute chan tur a ni ang.
10. Intihsiaakna a thawnthu thehluhte hi Central YMA-in a neitu nihna (copyright) kum 2 chung atan a nei ang a, he neitu nih hi thawnthu thehluk a nih ațanga kum 2 chung atan a ni ang.

(Phek 2-na)

YMA chu ñanpui ngaite ñanpuitu a ni. - YMA Kumpuan : Zirna uar

Editorial Board :
Represent: Pu Rotlingpuia
Editor: Pu Ricky MS Dawngzela
Jt. Editor : Pu Lalsiamkima
Treasurer: Nl. Florence Zoremsangi
Cir.Manager: Tv. Samuel Lalpekhlua
Contact No: 9862501858 / 9612691291
9612761781 / 7005494983

FLS Station - 9612566886
Chawngbawla Section
Leader : Pu F. Lalbiaksanga
96121 55162
Secretary : Tv. R. Lalnuntluanga
82599 60032
Vanapa Section
Leader : Pu Lalchualova
87300 99599
Secretary : Tv. Lallawmzuala
87875 41803
Khuangchera Section
Leader : Pu Lalramzaa
76408 95924
Secretary : Pu Zachungnunga Hrahse
76299 69989

Editorial.....
Pawlitik i luhchilh ang u
Hmanlai chuan khaw hrang hrangah lal leh a khawnbawl upate'n ro an rel a, mipuite pawhin an rorelna an zahin an ngai pawimawh hle thin a ni. April ni 6, 1946-ah Mizo Union (Mizo Common People's Union) lo dingin an thupui ber lal ban kha an kalpui a. Assam hnuaiah kum 1952 April ni 25-ah District Council hawn niin Mizo Union chuan sawrkarna an la a. Tichuan, kum 1954 August thla atang chuan lal ban niin, democracy kalphung zawmin rorel tan a ni ta.
Mizo Union hian lal rorelna kha an ningin an duh lo viau niin a lang a; chutih rual chuan an rorel hun lai khan Mizoram an hmangaih hle niin a hriat. An pamham loin, thahnem ngai takin, mahni hrehawm pawisa lovin ram tan an thawk thin niin an chanchin ziah a ni a. Sitting tura hmun hla tak tak atanga zan riak meuha ke a kal khawm, bial fang tur pawha lirthei mamawh takkha, lirthei lei aia tul danga hman tura sum an dah thei te kha a ropui hle a ni.
Mahse, engtik lai atangin nge tih hriat chiah loh mahse, mahni hmasialna leh pawlitik tuinu in kan ram rorelna a pawlh dal tih chu a lang reng mai. Pawlitik chu mi fel leh tha, mi piangtharte tel ve na tur hmun ni lo in, dawt sawi thiam, mi thlem thiam leh mahni hmasial thiam te huangah kan dah ta ngawt mai.
He ngaihdan hi ngaihdan dik lo a nih zia leh, ram rorelnaah hian Pathianin inrawlh a duhzia leh roreltu tha a duhzia hi kan hriat a, chung mi nei thei tura rilru senga pawlitik kan tuipuia kan ngaihven chhoh a ngai hle.

Branch YMA Office Bearer		
President Pu HD Daniala 9863212083	Secretary Pu Lalremsiama Varte 9862327112	Treasurer Pu David lalrosanga 9436158962
Vice President Pu S. Lalthangliana 8787326114	Assistant Secretary Nl. Florence Zoremsangi 9612761781	Financial Secretary Pu Rotlingpuia 9862385193

(Phek 1-na zawmna)
Hetih chhung hian Central YMA remtihna lo chuan hmun danga theh darh phal a ni lo.
1 1. Intihsiakna result leh lehkhabu tlangzarh programme hi hun khata hman tur a ni ang a, programme kimchang inhriattir leh tur a ni ang.
Intihsiakna kalphung tur :
1. Intihsiakna hi thupui hran a awm lo va, a ziaktuin ama duh lam hawi zawng apiang a zia thei ang.
2. Thumal 15,000 (singkhat sangnga) aia tam lo a ni tur a ni.
3. A tak behchhana thawnthu hi phuah phal a ni a, mi ziahsa entawn/lehlin erawh phal a ni lo.
4. Zahmawh rawng kai leh tawngkam mawi lo te pumpelh hram ni se.
Lawmman :
Lawmman Pakhatna -
₹ 70,000/- leh Certificate
Lawmman Pahnihna -
₹ 50,000/- leh Certificate
Lawmman Pathumna -
₹ 30,000/- leh Certificate
Consolation Prize (Top 10 chin tan) - ₹ 3,000/- leh Certificate
A thehluttu tam ber Branch -
₹ 5,000 leh Certificate
Tun dinhmun ah mi 81 in an thehlut tawh e

Thlan siam hnatlang neih a ni
Nimin khan Khuangpuilam Branch YMA chuan thlan la siam lohte siamin an hnatlang a. Mi tlawmngai engemaw zah thawk chhuakin an siam zo thei ni a hriat a ni.
Tlawmngaia hnatlanga thawk chhuak zawng zawngte chungah Branch hruaitute chuan lawmthu an sawi tak meuh meuh a ni.
Mami Pa Mumang
Mami pa chu a mumangah S. Korean lemchan thiamho hmuin, an thinrim thu an lo hrilh a.
Kan chet fai leh thianghlim vanga kan lemchan ngaisang si hi a taka min entawn duh miah lo hi na kan ti, an lo ti a.

CYMA hmalakna
6.09.2020 (Pathianni): Secretariat Conference Hall ah Covid-19 chungchanga inrawnkhawmna meeting neih a ni a. Hetah hian Pu Vanlalruata, President; Prof Lalnuntluanga, Gen. Secy; Dr Malsawmliana, Asst. Secretary leh Pu Roneithanga, Fin.Secy te an tel.
7.09.2020 (Thawhtanni) : Dar 3:00pm ah Central YMA OB meeting neih a ni.
8.9.2020 (Thawhlejni) : Chawhma dar 10:30ah CM Conference Hall ah Chapchar Kut 2020 Souvenir 'Nghilhloh bu' chu Chief Minister in a tlangzarh a. Hetah hian Dr Malsawmliana, Asst. Secretary a tel.
- Dar 3:00pm ah Secretary, Sports & Youth Services office ah NSS Award committee neih a ni a; hetah hian Pu Joseph Vanlalhruaia Sailo, CEC a tel.
- Dar 3:00pm ah CYMA Office ah CYMA OB leh Sub-Hqrs Study Group ten Joint meeting an nei.
10.09.2020 (Ningani) : Dar 1:30 pm-ah Secretariat Conference Hall-ah Covid-19 chungchanga inrawnkhawmna meeting neih a ni a. Hetah hian Pu Vanlalruata, President; Pu Fabian Lalfakawma, Treas. leh Pu Roneithanga, Fin.Secy an tel.
No. CYMA 74/2019-2020/20 of 5.9.2020
Central Young Mizo Association
Mizoram : Aizawl
Central YMA Thuchhuak
1) Vawiin September 5, 2020 (Inrinni) Teachers Day lo thlengah hian tlang hrang hranga zirtirtute duhsakna chibai kan buk a che u. Raltiang ram thleng tura min kaihruaitu zirtirtute, kan ram leh hnam tana thahnemngai taka in hnate thawk chhunzawm zel turin kan ngen a che u.
2) Saizawh 'W' hmuna Mizo pawisawi lote, Takam hote'n kut an thlak hi Central YMA chuan a dem tak zet a; pawisawilo kutthlaktute hi dan anga hremna a na thei ang ber pe turin Sawrkar kan phut tlat a ni.
3) Central YMA-in Assam Rifles-te Mizo mipuite hnena ngaihdam dil tura a ngenna chu, vawiin chhun dar 12:50 pm khan an ngaihdam dilna dawn a ni.
Sd/-
Prof. Lalnuntluanga
General Secretary

Thu ziaak Huang

HRI LENG KARAH 'AWMA' KHAALA AWME...

- Pastor Dawnga

Covid-19 dan tuma ãan kan lo lâk ve na te, him dan kan inzirtirte leh kan inkhapsek zozaita chuan min chhan zo ta lo a ni ber a. Mahse, he hri leng hi kan hneh ang, kan hneh ngei tur a ni! Fimkhur tura zirtirna hi Bible-ah vawi 105 zet kan hmu a, Pathian ni lo thildang hlauh erawh Bible zirtirna a ni ve lo va, Kristiante thinlungah hlauhna leh mangannain ro a rêl phal a ni lo (Jh.14:1; Phil.4:6). Hri leng leh hlauhna hi hneh i tum teh ang aw!

I HNENAAWM KHA...“Gideon, Median râl hlau chung a Grep sâwr khura buh lo vaw mek hnenah Lalpa Vantirh koh chuan, "Nang mi chak huaisen, Lalpa chu i hnenah a awm e!" a rawn ti hlawl mai (Ror.6:11,12). Hlauva awm mek chu a hnena awm avâng chuan tihchak a ni a, Median râl a hneh ta!

Hmana Mosia hnena inlar AWMA kha a la dam a, nang leh keiah pawh hian nungin a la awm reng a (Ex.3:14; Mt.28:20). Hman ata tawh hmaraw tlâwm tê tê hmangin hmelm a hneh thin a; beram vengtu tiang hmangin tui thisenah a chang a, tui pui sen a chat baw k a, lungpui ata tui vuak chhuah a ni baw k a (Ex.7:15ff.; 14:16; 17:6; Num.20:11). A chhan chu AWMA vâng vek a ni.

Missionary ten inenkawl na ãa awm lohna hmunah chuan kawthalo damdawi hmangin khawsik an enkawl dam fo a, pum damdawi eiin lu nâ an dam fo baw k thin! Engtia awm thei nge ni ngai?! AWMA kha an hnena a awm vâng baw k a ni. Tunah pawh Corona virus tlenfai nan sahbawn phuan pawh a hmang mai a, puan nê m hmangin hnar leh kâa lut tur a dang chat thei a, mihring inhlat hmangin a kal zel tur a dal thei baw k. Tin, chu mai a ni lo: "A damdawi a la awm lo" an tih reng laiin kan hmuh phâk leh hman ãan em em damdawite leh tuilum hmangtein kan State-ah pawh za tam an dam ta! AWMA chu kan hnenah a awm ve vâng a ni. HALLELUIAH!

HLAU SI, HLAU SI LO...!“Lal Isua'n hlau tura min zirtir awm chhun chu 'A tihhlum hnua Gehenna-a paih theihna thu neia' (Lk.12:5) chauh a ni. Sakei hlautu chuan

Sakei hlata awm a duh a, Pathian hlau/tiitu erawh chuan Pathian a hnaih sauh a, a hnena AWMA avangin hnehtu a ni leh thin. Nangmah mai chuan i nêp kha! I hnena AWMA khan nangmaha manganna leh hlauhna kha hnehsak che se la, chakna, huaisenna, thlamuanna leh hahdamna pe mawlh che rawh se. Chutiang tur chuan a thla hnuaiah tlu lut zel rawh le.

Pastor A.W.Tozer-a chuan "Ramhuai ka hlau lo; min bei thei na a, ka zawmpui Pathian, keimaha chêng hi a ngam loh avângin" a ti a. Nang leh keiah pawh hian chu Pathian chu a awm reng a, "In thinlung mangang suh se, Pathian in ring e" min ti e (Jh.14:1). ‘Engah mah mangang suh u; engkimah ãawngtai leh dilin, lâwmthu hril tel zelin, in duhnate chu Pathian hnenah hriattirin awm zawk rawh se. Tichuan, Pathian thlamuanna, rilru reng renga hriat sen loh khan, in thinlung leh in ngaihtuahnate chu Krista Isuaah chuan a vensak ang che u" (Phil.4:6).

India-in China rûmthai h lêt ve nana a lei, Rafale Jet Fighter hlannaah pawh AWMA chu a awm zel a. A puithiam kâ a hmang a, ringlo mi tam tak karah himna awmchhun a nihzia 'Sam 46' hmangin a inpuanchhuah kha! Nang pawh i hnena AWMA kha mi chak a ni tih hria la, bêl tam la, a chah fo che - FIMKHURNA, THUAWIHNA, CHAK TAKA AWM LEH HUAISENNA te kha i hmanraw hriam ni se, amah nen Covid-19 hi lo chîl nek ang che.

"Sipaihote Lalpa chu kan hnenah a awm a, “Jakoba Pathian chu kan kulhbing sang a ni" (Sam 46:11)

KOLASIB DISTRICT A COVID19 CONTACT TRACING LEH TESTING CHUNGCHANGAH C.M.O. IN THUTHARLAKHAWMTUTE A KAWM

Dt 11.09.2020 chawhnu khan Dr. Lalhlimpua, Chief Medical Officer, Kolasib chuan COVID19 Contact Tracing kalpui dan leh Test hrang hrang neih dan chungchangah thutharlakhawmtute a kawm.

Dr. Lalhmimpua CMO chuan Contact Tracing kalpui dan leh Test neih dan chungchangah sawrkarin kalphung a duante mitinin kan hriat a, a tul ang a, felfai taka hmalak a nih theih nan leh mipuite an chia i loh nan tih tur leh tih loh tur kan hriattlan a tul thu a sawi a. Kolasib District chhung a COVID19 Contact Tracing kalpui a nih dan turte a hnuai ami ang hian a sawi a ni:

1. Covid-19 vei ni a rinhllehthe chu an awmna atanga hnai ber Health Worker / Medical Officer hnenah an in report vat tur a ni. In report te chu contact Tracing format 1 hmangin IDSP section CMO Office, Kolasibah rang takin report an rawn pe ang a. District contact tracing team in an buaipui nghal char char ang a, a tul angin an thlifim ang a, test tihsak tul apiangte tihsak zel an ni ang.
2. Contact tracing team hi Kolasib town, CHC/PHC level leh Sub Centre level ah din vek a ni a. Anni hian mahni bial theuh positive contact neite contact tracing format 1 hmangin rang takin CMO office, Kolasibah an report ang. Heng a mawhphurtur hian medical Officer leh Health Worker te ruat vek an ni.
3. Khawtin / Vengtin VLTF te pawhin rinhlleh an neih chuan contact tracing team ah report pek hmasak hi a pawimawh ber a ni.
4. Positive contact neite test nan hian RAT (Antigen) hman phal a ni lova, RT-PCR emaw TruNAT chauh hman tur a ni.
5. Kolasib khaw chhung bik test ngai te chu :
 - (i) Polytechnic, Thingdawl.
 - (ii) SIRD Hostel, Kolasib
 - (iii) Govt. Kolasib College
 - (iv) RSTC, Kolasibah te Swab sample lak sak thin an ni ang.
6. Kolasib khaw pawn ami test ngai, Kolasib kal remchang theilo te an awm a nih chuan an bialtu PHC/CHC ah sample collection team member ten kal chilhin swab sample an lak sak thin ang a, hemi team-te hman tur veivahna pawh Kolasib Bawrh sap-in ruahmanna a siam tawh a ni.
7. First contact nilo, mahni dinhmun hriat duh vanga in test duh te chuan RT-PCR-ah Rs. 4500/-, TruNAT-ah Rs. 3000/- an chawi a ngai dawn a ni.
8. TruNAT test result hi IDSP section, CMO office Kolasibah thehluh a ni ang a, CMO office atang hian state IDSP ah thawn a ni ang. Result hi State DIPR chauh in a puang thei a ni.
9. Swab sample lak sak te hi a lo positive chuan Covid Care Centre (CCC) ah dah luh nghal zel an ni ang. A negative te chu ni 14 chhung Home Quartine tur an ni.
10. Contact tracing chungchanga hriat duh neite chuan a hnuai a number tarlan ahte hian zawh fiah theih reng a ni e. 8974768597 / 9774403199

Mi chung a ngilneihna lantir hi kan pek chhuah theih zinga bo thei miah lo a ni a, a lo kir leh zel thin.

Tunkâr chhunga thil thleng langsâr zual

08.09.2020 : Brazil aini India ramah Covid-19 kai tam tawh zawk. World Health Organization (WHO)-in a tarlan dan chuan India ram hi thla khat dawn chu khawvel ram zinga ni khata hri kai hmuh chhuah tam ber ram a ni tawh a, hri kai tam lama pathumna ni thin kha tunah chuan pahnihna ni tawhin, Brazil aini India ramah hri kai an tam tawh zawk a ni. Hetih lai hian Covid-19 thihpui erawh Brazil ramah an tam zawk thung.

08.09.2020 : India rama Covid-19 kaite enkawl na hmun lian ber, Bengaluru International Exhibition Centre-a Covid Care Centre siam chu September 15-ah khar a ni dawn. State sorkarin hri kai zingah taksa lama harsatna nei lo, asymptomatic and mildly symptomatic patient-te chu in lama in enkawl a phalsak tak avangin, hetiang mi enkawl na tur siam, khum 10,000 awm theihna centre-ah hian enkawl tur an awm tawh loh avangin khar a ni dawn a ni. He centre-a bungraw hrang hrang, khum, fan, dustbin, leh bungraw dangte chu sorkar hostel leh hospital-ah te a thlawnin sem a ni ang.

09.09.2020 : Covid-19 hri veite hmuhchhuahna 'TrueNAT laboratory' chu District Hospital-ah bun fel a ni. Ni 9/9/2020 (Nilaini) chawhma dar 11 khan bialtu MLA K Lalrinliana, Minister of State chuan a hawnna a nei. He khawl hi Kolasib District mipui tan tangkai hle tura ngaih a ni.

09.09.2020 : Health & Family Welfare department chuan, Covid-19 dona atan bungrua leh hmanrua chi hrang hrang lei nan cheng nuai 1,797 an séng tawh.

Directorate of Health Services chuan bungraw chi hrang hrang 42 leina atan cheng nuai 577 an hman a; Health & Medical Education directorate-in bungraw/hmanrua chi hrang hrang 38 lei nan cheng nuai 785 an séng tawh thung.

National Health Mission (NHM), AYUSH leh Zoram Medical College (ZMC) sum atangin bungrua lei thin a ni baw. NHM hnuaiah bungraw chi hrang 48 lei nan cheng nuai 369 hman a ni a, AYUSH atang-in bungraw chi 6 lei nan cheng nuai 37.19 hman niin, ZMC sum atangin cheng nuai 28.20 séngin bungraw pakhat lei a ni.

09.09.2020 : Sputnik V phase 3 clinical trial India-ah neih tum Russia sorkarin a pawm tawh, Covid-19 vaccine hmasa ber tura ngaih, 'Sputnik V' chu India-ah tun thla hian phase 3 clinical trial neih pui tum a nih thu Russian Direct Investment Fund's (RDIF) head Kirill Dmitriev chuan a sawi.

India bakah hian Saudi Arabia, United Arab Emirates (UAE), Philippines leh Brazil-ah pawh trial hi neih tum a ni baw. Phase 3 trial hi kumin October leh November thla chhunga a preliminary result hriat hman tum a ni.

Russia hian Covid-19 vaccine siam chhuah thuai a tum a, vaccine a siam hi clinical trial hrang hrangah enchhinna neih chhoh mek zel a ni. Mahse World Health Organisation (WHO) chuan kar liam ta Zirtawpni khan thuchhuah siamin, vaccine hi ram hrang hrang ten siam mah se a him tawh em tih finfiahna neih a nih loh chuan an pawm dawn loh thu a tarlang a ni.

11.09.2020 : Exam thulh, Mizoram Board of School Education (MBSE) chuan thu-chhuah siamin, September 14, 2020-a DIET Examination, 2020 buatsaih tum chu tun hnuaiah Covid-19 darh zual zel avangin tiam chin awm loa thulh a nih thu an tarlang. Exam neih leh hun tur chu inhriattir leh tura tih a ni.

11.09.2020 : Serchhip DC Kumar Abhishek chuan Dt 10.09.2020 khan Serchhip District Hospital-a bun thar Covid-19 vei leh vei loh hriatna tura swab sample endikna khawl TrueNAT laboratory a hawng a, mi pakuate swab sample endik ngal a ni.

AstraZeneca-in Covid-19 vaccine a siam Clinical trial neih mek a titawp lailaw

British-Swedish multinational pharmaceutical and biopharmaceutical company, AstraZeneca chuan Covid-19 vaccine a siam, clinical trial phase 3-a neih mek chu volunteer zingah natna nei an awm avangin niman khan a titawp lailaw.

AstraZeneca leh University of Oxford tangkhawp chuan Covid-19 hri kai tiham a nih theih nan vaccine an siam a, he an vaccine siam hi hmun hrang hrangah clinical trial neih mek a ni.

Enchhinna an neih hi a thawh thumna an kai tawh a, mahse volunteer-te zingah a chhan hriat loha natna nei an awm tak avangin niman khan trial neih mek chu tihtawp lailaw a ni ta a ni. An damdawi siam hi a him tawh em tih enletna an nei tha leh dawn a ni tiin AstraZeneca company thupuangtu chuan a sawi.

Trial lian tham neih thinah chuan damlohna thil a awm palh theih thu AstraZeneca chuan a tarlang a, hemi kawngah hian uluk leh fimkhur taka enletna neih an tum tih a tarlang baw.

Georgetown University-a Center for Global Health Science and Security-a research professor, Julie Fischer chuan damdawi siam chhuah tumna kawnga tihtawp lailaw awm thin chu dan pangngai anga a awm thin thu a sawi. "Tihtawp lailaw hun a thlen tawh chuan a hma ai nasa zawka kan fimkhur a ngai tihna a ni a, chuvang chuan hemi hun chhung hi damdawi siam chhuah tum kha a him tawh em tih uluk taka enletna hun a ni," tiin Julie Fischer chuan a sawi.

AstraZeneca leh Oxford University tangkawp chuan Covid-19 vaccine siam chhuah a nih theih nan ram hrang hrang an lo thawhpui tawh baw a, clinical trial hmun hrang hrangah neih ni tawhin, nakkum lamah chuan vaccine hi mipui hman theiha peih fel an tum thu a hman an lo tarlang tawh a ni.

Huawei MatePad T8 India ramah tlangzarh

Huawei MatePad T8 tablet chu India ramah tlangzarh a ni ve ta a, September 15 atangin Flipkart chuan an zuar chhuak an dawn.

Khawvel ram dangah chuan May thla khan tlangzarh tawh niin India ramah chuan tun thla atang hian an zuar chhuak ve tan dawn chiah a, budget tablet-ah chuan rintlak pawl tak tur a ni. 8 inch tablet niin variant chi hnih Wi-Fi only leh LTE model a awm.

Octa-core CPU a hman a, variant pahnih hi 2GB + 32GB storage niin game khelhna atan chuan a laktlak vak dawn lo tih a chiang a, chutih rual erawh chuan lehkhah chhiarna leh lehkhah zirna atan erawh a laktlak viau dawn thung.

Wi-Fi chauh hman hi Rs 9,999-a zawrh a ni dawn a, LTE model erawh hi chu Rs. 10,999-a zawrh a ni thung ang. Deepsea Blue colour chiah siam a ni a, Thawhlehi atang khan pre-order hun hawn a ni tawh nghe nghe. Pre order tan erawh hi chuan LTE variant zawk hi Rs. 9,999-in an discount dawn niin NDTV Gadgets 360 chuan an tarlang.

